


Arabako PSE-EEko exekutiba berritzeari uko egin dio Buesak

Bere aldekoekin bakarrik eratu du alderdiko batzorde eragilea

Arabako sozialisten sektore kritikoak ez du lortu batzorde eragilean inor sartzea. Fernando Buesak idazkari nagusiko karguari eutsi dio, baina, haatik, ez du onartu bere aldeko ez den inor, nahiz eta alderdiko askok berritzea ezinbestekotzat jotzen duten.



Nicolas Redondo, PSE-EEko idazkari nagusi berria, Arabako alderdiaren kongresuan izan zen atzo.

GUTIERREZ/EFE

Felix Iriarte / Gasteiz

SOZIALISTEN artean dabilen berrikuntza haizea ez da Arabara iritsi. Baliteke Fernando Buesa idazkari nagusiak pentsatzea bera dela berrikuntzaren bermea, baina alderdiko askok kritikatu egin dute Buesaren eta batzorde eragileko kideen «itxikeria».

Hirugarren Biltzar Nagusia egin zuten atzo Arabako sozialistek, eta gai nagusi bat zegoen mahai gainean: alderdiaren berritzea. Hala ere, batzorde eragile berrian ez dago berrikuntzarik, Buesarekin batera Javier Rojo idazkariorde nagusia, Luis Alberto Agiriano lehendakaria, Txarli Prieto eta Carmen Asiain ariko baitira, hau da, orain arteko «gune gogorra».

Miguel Angel Uzkizak, kritikoen aurpegiak, ez zuen izango itxaropen handirik goizeko ekitaldian Buesari entzun eta gero. Izan ere, Buesak bi mezu bidali zizkien batzorde eragilearen gestioaren berri emateko hitzaldian: bata, Euskadiko alderdi sozialistaren ordezkari ofiziala bera dela, eta, bestea, batzorde eragilea ez dela izan behar «borrokarako gunea». «Nicolas Redondo nire idazkari nagusia da, eta ez da bidezkoa zirikituak aurkitzera hona etortzea», esan zuen. Buesa, ordea, sektore kritikoan lerrokatu zen EAEko sozialisten Biltzar Nagusian, eta Arabako kritikoek Redondoren tesiak defenditu zituzten. Buesak, bat-batean, buelta eman zion egoerari, eta, gainera, Mario Onaindia ofizialistaren tesi batzuk bere egin zituen, esaten zuenaren froga gisa aurkeztuz.

Batzorde eragilean kritikoek presentziarik ez zela izango garbi geratu bazen goizeko ekitaldian, are nabariago gertatu zen arra-

tsaldean. Buesak, berritzea asmoak agerian uzteko edo, EEtik etorritakoekin negoziatu nahi izan zuen. Batzorde eragileak lehen baino zazpi kide gehiago ditu -hogei gaurtik aurrera-, baina Mikel Unzaluoren kordakoei bi besterik ez zien eskaini, orain arte zituztenak, alegia. EEko kide ohiak berrikuntzaren beharra eta alderdiko «gune gogorra» mugitzeko eskatu zion trukean, baina Buesak ezetz erantzun zion. Hori dela eta, bere aldekoekin bakarrik osatu du batzorde eragilea.

Uzkizaren sektore kritikoak ez ezik, beste zenbait kidek ere alderdian «haize freskoaren» beharra aldarrikatu zuten. Julio Herroer, esaterako, Buesaren ges-

tio txostenaren alde bozkatu zuen, baina esan zion alderdiaren berritzea ezinbestekoa dela. Buesak ordezkarien %74 bere alde azaltzea lortu zuen, %22 kontra agertu baziren ere.

Kritikoak, ordea, ez daude gustura zenbaki horiekin. Uste dute batzorde eragileak iruzur egin duela ordezkariak hautatzekoan. Uzkizak salatu zuen Araban ez daudela ia mila afiliatu, zenbaki ofizialek dioten bezala, askoz gutxiago baizik. Uste du alderdiko zuzendaritzak datu faltsuak eman dituela, euren aldeko ordezkariak lortzeko. Kritikoen «benetako» ordezkartza %40 dela baieztatu zuen, nahiz eta bozketan erdia baino lortu ez. X

Etxeko atean bonba bat jarri diote ertzain bati

Leherketa Donostiako Altza auzoan izan da

Vasco Press/Donostia

HIRU bonbona kanpingasek eta hiru aerosolek osatutako lehergailu bat jarri dute Donostian, ertzain baten etxeko atarian. Ertzaina Donostiako Altza auzoko Txirrita Bertsolaria kaleko etxebizitza bateko zortzigarren pisuan bizi da. Lehergailuak goizaldeko 03:30etan egin zuen eztanda eta kalte materialak baino ez zituen sortu. Barne Sailak leherketa izan zela baieztatu badu ere, ez du konfirmatu nahi izan etxearen jabea ertzaina denik, baina datu hori beste iturri batzuetan egiaztatu du Vasco Press agentziak.

Atentatuaren egileak etxebizitzako ataritik sartu eta ertzaina bizi den zortzigarren solairuraino igo ziren, eta atearen ondoan utzi zuten lehergailua.

Leherketak atea belztu egin zuen, baina inor zauritu gabe. Horrez gain, ez tandaren eraginez kaleko atea bere lekutik atera zen eta ispilu bat hautsi. Ertzaintzako artzailariak bertara joan ziren lehergailuaren hondarrak biltzera eta haren ezaugarriak aztertzeraz.

Vasco Press agentziaren datuen arabera, aurtun 85 eraso izan dituzte ertzainek, eta horietatik bost izan dira etxebizitzaren kontra (sua eragiteko lehergailuekin eta behin eztanda egin ez zuen lehergailu batekin). Ertzainen negozio partikularren kontrako bi eraso izan dira eta 19 ibilgailuen kontra. Gainontzeko erasoak patruilen kontra, agenteen kontra eta Ertzaintzaren egoitzen kontra izan dira. 1996an 114 eraso izan zituzten ertzainek. x

Larrabetzuko Herrikoari eraso egin diote koktelekin

Suak kalteak eragin ditu batez ere kanpoaldean

Erredakzioa / Bilbo

LARRABETZUKO Aretxabala Herriko Tabernari eraso egin zioten atzo goizaldeko 03:00ak eta 03:30ak bitartean. Lehen-dabizi, bi harri handi jaurti zituzten kristalaren kontra, eta, ondoren, koktelak bota zituzten. Itxuraz, harriekin eginiko zuloetatik koktelak barrura jaurtitzea zen helburua.

Dena den, kristala ez zuten guztiz apurtu eta, harriekin egindako zuloak txikiak izanik, ezin izan zituzten koktelak barrura bota. Alabaina, Herriko Tabernaren kanpoaldeak su hartu zuen koktelak lehertzean, eta suak kalteak eragin zituen eraikinean. Aretxabala tabernaren goialdean bizi diren

bizilagunak konturatu ziren suaz, eta haiek itzali zuten sortu eta lasterrera.

Larrabetzuko HBK azaldu duenez, nahiz eta azkenean kalteak handiak ez izan, sute handia gerta zitekeen, Herriko Taberna dagoen kalean -Andra Mari kalean- etxe guztiak bata bestearen kontra daudelako eta batzuk egurrez eraikiak direlako. HBK oraindik ez du baloraziorik egin, aurreneko aldia delako Larrabetzun gisa horretako eraso bat gertatzen dena.

Dena den, Larrabetzuko Herri Batasunak deituta kontzentrazioa egin zuten atzo gauean herriko plazan, sabotaje ekintza hori gaitzetsi eta salatzeke. x

Universidad del País Vasco

Euskal Herriko Unibertsitatea

ERREKTOREGOA
RECTORADO

Lehiaketa publikoa
irakasle lagunen plazak

Argitara ematen da guztiek jakin dezaten, Euskal Autonomi Erkidegoko prentsan 1997ko irailaren 28an argitaratutako lehiaketari dagozkien lehiakide onartu eta ez onartuen behin-behineko zerrendak Lehiaketa-Ataleko Campusetako Errektoreordetzetako iragarki-tauletan azaltzen direla.

Leioan, 1997ko urriaren 19a
IRAKASLEEN ERREKTOREORDEA,
Miren Azkarate Villar.

EUSKO JAURLARITZA

GOBIERNO VASCO

HEZKUNTZA
UNIBERTSITATE
ETA IKERKETA SAILA

DEPARTAMENTO DE
EDUCACIÓN, UNIVERSIDADES
E INVESTIGACIÓN

IKASTETXE PUBLIKOETAN ORDEZKAPENAK EGITEKO
ORDEZKOGAIEN ZERRENDEEN IREKIALDIA

Araudi ezargaria: 1995eko irailaren 13ko Erabakia, Hezkuntza, Unibertsitate eta Ikerketa Saileko Langileriaren Kudeaketa zuzendariarena (1995-10-05eko EHAA).

Espezialitateak:
Arabako LHa: IE
- 1.HE edo baliokideaz: Metaleko Praktiak
- 2.HE edo baliokideaz: Metaleko Praktiak eta Metaleko Teknologia.

Gipuzkoako LHa: IE
- 1.HE edo baliokideaz: Automozio praktikak, Elektronika praktikak, Elektrizitate praktikak, Zuraren Tailerra, Ileapainketa eta Estetikak Tailerra, Alemanera.
- 2. HE edo baliokideaz: Automozio praktikak, Elektronika praktikak, Elektrizitate praktikak, Zuraren Tailerra, Ileapainketa eta Estetikak Tailerra, Administrazio eta Merkataritza Teknologia, Elektrizitate Teknologia eta Zuraren Teknologia.

Bizkaiko LHa: Maisu-maistrak
- 1.HE edo baliokideaz: Kontsultaria.
- 2.HE edo baliokideaz: Kontsultaria eta Ingelesa.

Eskabideak aurkezteko epea:
Urriaren 20tik aurrera zabalik egongo dira zerrendak.

Argibide gehiago jasotzeko, dagokion Hezkuntzako Lurralde Ordezkaritzara jo (Arabako tel.: 18-72-10 eta 18-72-11; Bizkaiko tel.: 488-10-94 eta 488-10-95; eta Gipuzkoako tel.: 41-28-50/64).

Halaber Gipuzkoako Lurralde Historikoan honako plaza hauek eskaintzen dira: "Lur garraioaren kudeaketa eta plangintzaren modulo profesionala" Ordezkaritzako iragarki-oholean daude ikusgai plaza honen esleipenerako oinarriak.